

**PRAVILNIK O POSTUPKU IZBORA AKADEMSKOG
OSOBLJA**

Juli, 2025. godine

Na osnovu člana 63. Zakona o visokom obrazovanju Tuzlanskog kantona – prečišćeni tekst („Službene novine Tuzlanskog kantona“, broj: 21/21, 22/21, 5/22, 11/22, 16/22 i 5/25), i člana 39. Statuta Univerziteta, na 17. (sedamnaestoj) sjednici održanoj dana 18.07.2025. godine, Senat visokoškolske ustanove Univerzitet FINRA Tuzla donosi:

PRAVILNIK o postupku izbora akademskog osoblja

I OPŠTE ODREDBE

Član 1.

(Predmet Pravilnika)

(1) Pravilnikom o postupku izbora akademskog osoblja utvrđuju se postupak i uslovi za izbor akademskog osoblja u odgovarajuće naučno-nastavno zvanje, angažovano u radnom odnosu ili po ugovoru o izvođenju nastave (ugovor o djelu) na visokoškolskoj ustanovi Univerzitet FINRA Tuzla (u daljem tekstu: Univerzitet).

(2) Cilj je da se ovim Pravilnikom:

- 1) Definišu uslovi za izbor u naučno-nastavno zvanje;
- 2) Da se osigura da postupak izbora bude jasan i jednoobrazan za sve;
- 3) Da se jasno i precizno utvrdi proces i koraci kod sticanja izbora; te
- 4) Da se utvrdi nadzor i kontrola čitavog postupka, i kontinuiranog poboljšanja istog.

II POSEBNE ODREDBE

Član 2.

(Naučno-nastavna zvanja)

(1) Na Univerzitetu vrši se izbor u naučno-nastavna zvanja, kako slijedi:

1. Redovni profesor;
2. Vanredni profesor;
3. Docent;
4. Lektor;
5. Viši asistent;
6. Asistent.

Član 3.

(Minimalni uslovi za izbor u naučno-nastavna zvanja)

(1) Minimalni uslovi za izbor u naučno-nastavna zvanja su:

1. *Redovni profesor:*
 - a) Proveden najmanje jedan izborni period u zvanju vanrednog profesora;
 - b) Najmanje dvije objavljene knjige;
 - c) Najmanje osam naučnih radova objavljenih u priznatim publikacijama; i
 - d) Mentorstvo najmanje po jednog kandidata za stepen drugog i trećeg ciklusa studija.

Uslovi od a) do c) moraju biti ispunjeni nakon sticanja zvanja vanrednog profesora.

2. *Vanredni profesor:*
 - a) Proveden najmanje jedan izborni period u zvanju docenta;

- b) Najmanje pet naučnih radova objavljenih u priznatim publikacijama;
- c) Objavljena knjiga;
- d) Originalni stručni uspjeh kao što je projekat, patent ili originalni metod; i
- e) Najmanje jedan kandidat za stepen drugog ciklusa studija.

Uslovi od a) do d) moraju biti ispunjeni nakon izbora u zvanje docenta.

3. *Docent:*

- a) Naučni stepen doktora u datoj oblasti;
- b) Najmanje tri naučna rada objavljena u priznatim publikacijama; i
- c) Pokazane nastavničke sposobnosti.

4. *Lektor:*

- a) Stepent drugog ciklusa studija (magisterij).

5. *Viši asistent:*

- a) Stepent drugog ciklusa studija (magisterij).

6. *Asistent:*

- a) Odgovarajući univerzitetski stepen sa najmanje 240 ECTS bodova; i
- b) Najniža prosječna ocjena 8 ili 3,5.

(2) U slučaju da kandidat pri izboru u zvanje, nije mogao ispuniti uslov mentorstvo kandidata za drugi, odnosno treći ciklus studija iz razloga što u dva izborna perioda u zvanju docenta, odnosno vanrednog profesora nije bio organizovan drugi, odnosno treći ciklus studija, uvodi se ekvivalencija odnosno supstitucija mentorstva sa tri dodatna naučna rada objavljena u priznatim publikacijama, u odnosu na minimalne uslove utvrđene zakonom.

(3) Pod pokazanom nastavničkom sposobnošću, podrazumijeva se iskustvo u nastavnom radu na visokoškolskoj ustanovi.

Član 4.

(Period izbora u naučno-nastavna zvanja)

Period na koji se bira akademsko osoblje u naučno-nastavno zvanje je:

1. Redovni profesor trajno;
2. Vanredni profesor na period od 6 (šest) godina, s mogućnošću ponovnog izbora;
3. Docent na period od 5 (pet) godina, s mogućnošću ponovnog izbora;
4. Lektor na period od 5 (pet) godina, bez mogućnosti reizbora;
5. Viši asistent na period od 5 (pet) godina, s mogućnošću ponovnog izbora, ako se postigne stepen trećeg ciklusa;
6. Asistent na period od 4 (četiri) godine, bez mogućnosti reizbora.

Član 5.

(Uslovi za izbor u isto ili više naučno-nastavno zvanje)

(1) Prilikom izbora u isto ili više naučno-nastavno zvanje, uzimaju se u obzir:

- a) Objavljeni radovi;
- b) Knjige i rezultati vlastitih istraživanja u primjeni;
- c) Projekti;
- d) Mentorstva, odnosno javno predstavljani oblici umjentičkog stvaralaštva.

(2) Uslovi za izbor u akademsko zvanje, koji su navedeni u stavu (1) ovog člana, uzimaju se u obzir samo ukoliko su nastali u vremenu od posljednje izbora u zvanje. Prilikom izbora u isto ili više naučno-nastavno zvanje, uzimaju se u obzir samo objavljeni radovi, knjige i rezultati vlastitih istraživanja u primjeni, projekti, te mentorstva odnosno rezultati ostvareni u radu akademskog osoblja nakon izvršenog posljednjeg izbora u zvanje, i koji se obavezno prilažu prilikom svakog izbora u zvanje.

(3) Akademsko osoblje na Univerzitetu ne može istovremeno posjedovati izbor u dva ili više različitih akademskih zvanja.

(4) Nastavniku koji je izabran u naučno-nastavno zvanje u jednoj naučnoj oblasti, na njegov zahtjev će se omogućiti izbor u više zvanje u drugoj srodnoj naučnoj oblasti, ukoliko ispunjava uslove za to.

(5) Ukoliko kandidat koji prije izbora u zvanje docenta nema iskustvo u nastavnom radu u visokoškolskoj ustanovi, može biti izabran u zvanje docenta, ukoliko pored ostalih propisanih uslova za izbor u zvanje docenta, održi pristupno predavanje iz nastavnog predmeta, odnosno uže naučne/umjetničke oblasti za koju je konkurisao.

(6) Pristupno predavanje iz prethodnog stava, kandidat je obavezan održati pred Komisijom iz člana 75. Zakona o visokom obrazovanju TK i studentima iz nastavnog predmeta, odnosno uže naučne/umjetničke oblasti za koju je konkurisao. Komisija ocjenjuje uspješnost pristupnog predavanja, uzimajući u obzir rezultate evaluacije predavanja od strane studenata.

(7) Univerzitet je dužan, na javan i transparentan način, oglasiti vrijeme održavanja pristupnog predavanja.

(8) U postupku reizbora, uzimaju se u obzir i ranije ispunjeni uslovi za isto naučno-nastavno zvanje.

(9) Univerzitet je dužan svakih pet godina sačiniti program mjera za stvaranje uslova za napredovanje akademskog osoblja, a na godišnjem nivou pratiti realizaciju programa mjera.

Član 6.

(Komisija za ocjenu pristupnog predavanja)

(1) Komisiju za ocjenu pristupnog predavanja imenuje Senat Univerziteta.

(2) Odluku koja sadrži datum i vrijeme održavanja pristupnog predavanja potpisuje predsjedavajući Senata, i ista se objavljuje na oglasnoj ploči Univerziteta najkasnije 7 (sedam) dana prije održavanja pristupnog predavanja.

(3) Pristupno predavanje traje jedan nastavni čas, i prisutni mogu postavljati pitanja vezana za održanu temu kandidatu za izbor u nastavno zvanje.

(4) Nakon održanog pristupnog predavanja, Komisija sačinjava Izvještaj o održanom pristupnom predavanju kandidata i dostavlja ga Senatu Univerziteta.

Član 7.

(Postupak izbora u nastavna zvanja)

(1) Izbor akademskog osoblja u svim slučajevima vrši se objavom konkursa, u skladu sa uslovima i kriterijima određenim Zakonom, Statutom i opće prihvaćenim standardima u datoj struci.

(2) Za pripremanje prijedloga za izbor u naučno-nastavno zvanje, imenuje se Komisija u sastavu od 3 ili 5 članova, u istom ili višem zvanju od zvanja u koje se kandidat bira, uz prethodno pribavljenu pisani saglasnost svakog predloženog člana komisije za angažman u komisiji.

(3) Komisiju iz prethodnog stava imenuje Naučno-nastavno vijeće fakulteta.

(4) Za pripremanje prijedloga za izbor u zvanje asistenta, višeg asistenta i lektora, naučno-nastavno vijeće imenuje Komisiju u sastavu od 3 člana, koji mogu biti u akademskom zvanju docent, vanredni profesor ili redovni profesor, a uz prethodno pribavljenu pisanu saglasnost, svakog predloženog člana komisije za angažman u komisiji.

(5) Većina članova *Komisije za pripremanje prijedloga za izbor* mora biti iz iste, a ostali članovi mogu biti iz srodne naučne, odnosno umjetničke oblasti za koju se kandidat bira.

(6) Izbor u više zvanje ili reizbor akademskog osoblja, provodi se objavljivanjem internog konkursa, na način utvrđen Statutom Univerziteta.

Član 8.

(Konkurs za izbor u naučno - nastavna zvanja)

(1) Konkurs za izbor u nastavna zvanja raspisuje se za užu naučnu oblast, odnosno predmete naučne oblasti.

(2) Odluku o raspisivanju konkursa donosi Senat Univerziteta.

(3) Konkurs za izbor se objavljuje u najmanje jednom dnevnom listu, i na službenoj web stranici Univerziteta.

Član 9.

(Stručnjak iz prakse)

(1) Univerzitet može, bez raspisivanja konkursa i bez zasnivanja radnog odnosa, angažovati istaknutog stručnjaka iz prakse za izvođenje određenih sadržaja nastavnog plana i nastavnog programa.

(2) Pod istaknutim stručnjakom iz prakse u smislu prethodnog stava, podrazumijeva se lice koje posjeduje radno iskustvo i rezultate iz oblasti na koju se angažuje na Univerzitetu.

Član 10.

(Rad Komisije za pripremanje prijedloga za izbor)

(1) Komisija za pripremanje prijedloga za izbor u pogledu sastava mora ispunjavati uslove navedene u članu 6. ovog Pravilnika.

(2) Komisija za pripremanje prijedloga za izbor priprema Izvještaj o prijavljenim kandidatima, i predlaže za izbor jednog ili više kandidata, u skladu sa uslovima iz konkursa.

(3) Izvještaj o prijavljenim kandidatima iz prethodnog stava Komisija dostavlja Naučno-nastavnom vijeću fakulteta.

Član 11.
(Izveštaji Komisije za pripremanje prijedloga za izbor)

(1) Izveštaj Komisije za pripremanje prijedloga za izbor treba da sadrži biografske podatke o kandidatu, pregled i ocjenju njegove naučne aktivnosti, spisak i analizu radova koje je kandidat izradio kao autor ili koautor, kao saradnik, spisak objavljenih radova u naučnim i stručnim časopisima i zbornicima, kao i spisak referata na kongresima i spisak patenata, uspjeh kandidata u obrazovnom procesu i njegov aktivan doprinos istom, naučni doprinos i priznanja, te decidno formulisan prijedlog u koje se zvanje kandidat bira.

(2) Rok za dostavljanje Izveštaja Naučno-nastavnom vijeću fakulteta je 30 dana od isteka roka za podnošenje prijava na konkurs.

(3) Na osnovu podnesenog Izveštaja Komisije za pripremanje prijedloga za izbor, Naučno nastavno vijeće fakulteta predlaže izbor akademskog osoblja i dostavlja prijedlog Senatu Univerziteta na odlučivanje.

(4) Dekan fakulteta je odgovoran da se postupak pripremanja prijedloga za izbor iz prethodnog stava, provede u rokovima utvrđenim ovim Pravilnikom.

Član 12.
(Rad Senata u provođenju postupka izbora)

(1) Na osnovu dostavljenog prijedloga za izbor Naučno-nastavnog vijeća fakulteta, Senat donosi odluku o izboru u roku od 30 dana od dana dostavljanja prijedloga.

(2) Senat nije vezan prijedlogom Komisije, i može iz razloga neusklađenosti s odredbama Zakona, Statuta i internih akata Univerziteta, donijeti odluku o vraćanju prijedloga odluke Komisije radi njegovog preispitivanja i usklađivanja sa pomenutim propisima.

(3) Ako se započeti postupak izbora u akademsko zvanje ne okonča u roku od 6 (šest) mjeseci od dana raspisivanja konkursa, Senat će konkurs poništiti.

(4) Senat donosi odluku o izboru kandidata u predloženo zvanje većinom glasova ukupnog broja članova Senata.

III ZAVRŠNE ODREDBE

Član 13.
(Tumačenje)

Nadzor nad provedbom ovog Pravilnika vrši rektor Univerziteta i dekani fakulteta, a tumačenje Pravilnika vrši Senat Univerziteta.

Član 14.

(Stupanje na snagu i primjena)

Pravilnik stupa na snagu danom donošenja, od kada se i primjenjuje.

Broj: 03-1052-15-7/25

Tuzla, 18.07.2025. godine

PREDSJEDAVAJUĆI SENATA

